



## **Uranimik il. II., misissueqqaarnermut, ujaasinermut piiaanermullu inertequteqarneq pillugu Inatsisartut inatsisaat.**

### **Siullermeerinnineq**

Siullermik saqqummiussisumut qujanaq Ineqarnermut, Attaveqaaserssutinut, Aatsitassanut, Inatsisit atuutinneqarnerannut, Naligiissitaanermullu Naalaakkersuisumut.

Uranimik inertequteqalernissamik siunnersuut Naleqqamiit ima oqaaseqarfignissavarput.

Nunatsinni mingutitsinerulernissaq akuersaanngilluinnarparput, sumiluunniit kuummi imersinnaasariaqarpugut, sumiluunniit nunatta pissarititaani nerisinnaasariaqarpugut. Nunatsinni pinngortitarsuaq Uranisiornikkut innarlerneqarani kingulissatsinnut kingornutassanngortinneqarnissaat Naleqqamiit oqariartuutiguarparput. Kujataani innuttaasut toqqissisimasumik avatangiiseqarlutik inuusariaqarput uranisiornermi mingutitsinissarujussuaq ernumassutigiginagu aammalu nalunngilarput kujataa savaateqarfissuuvoq uumasuuteqarfiullunilu naatitanillu pissaqarfiullarluni, soorunami aamma aalisartut piniartullu ernumatinneqassanngillat aalisakkatik piniakkatillu uranimik innarlerneqarnissaannik. Qularutigineqassanngilarmi uranitalimmik aatsitassarsiorneq avatangiisinut ulorianartuummat.

Aatsitassarsiorluni uranitalinnik piiaasoqaraluarpat nunatsinnut annertunerusumik iluanaarutaanaviannngilaq, ukiumummi nunatsinnut 75 mio kr isertitsissutaasaleraluarpat Nunarput Qallunaat nunaatalu avittartussanngussavaat.

Siunissami atortutigut inerisaaneq pitsaanerulernissaannut mingutitsinnginnerulernissamut utaqqisinneqarsinnaavoq, nunatsinniittummi qaqqat allamut nuunneqarsinnaanngillat, tassaniittuartaapput kingulissatsinnut kingornutassanngortinneqarniarlik nunarsuattami

ineriartornerani mingutitsinnginnerusumik atortutigut inerikkiartorneq ingerlavoq. Qaqugu avatangiisinut innarliissutaanngitsumik iluaqutiginiarneqarsinnaalissagaluarpat tamanna eqqartoqqinneqarsinnaajumaarpoq – pingaartipparpulli taamaattoqassappat nunatta nammineq iluanaarutissat isertikkumaarai taamanikkussamut taamaatoqalissagaluarpat – pisuussutigut nunanut allanut selskaberujussuarnullu aatsitassarsiorfissuarnut tunniussuinnarnatigit, tamannami nunatsinnut iluaqutaanani ajornerulersitsiinnassasoq avatangiisitsinnut ilisimavarput, taamaattumik Naleqqamit oqaatigissavarput uranimik il.il., misissueqqaarnermut ujaasinermut piianermullu inerteqquteqarneq pillugu inatsisartut inatsisaattut siunnersuut tapersorsoratsigu.

Taamatut oqaaseqarlunga siunnersuut Inuussutissarsiornermut Aatsitassanullu Ataatsimiititaliamut innersuupparput.